

論

語

詳

解

詳解卷十五

郝敬

衛靈公第十五○貧莫如原憲豪侈莫如時君故次  
衛靈公

衛靈公問陳去於孔子孔子對曰俎豆之事則嘗聞之  
矣軍旅之事未之學也明日遂行在陳絕糧從去者病  
莫能興子路愠見現曰君子亦有窮乎子曰君子固窮  
小人窮斯濫矣

春秋世主惟知仲尼習禮博學多聞而已矣故犁彌  
謂齊景公云孔丘知禮而無勇靈公此問亦欲傲以

所不知夫子嘗言我戰則克冉有言學軍旅于孔子此對云未學何也世主好戰聖人每思去殺靈公所問適與願違故以未學辭之也其以俎豆對何也俎豆之事卽禮也聖教脩己治人惟禮扶危定傾惟禮記云聖人所以治人七情脩十義講信脩睦尚慈讓去爭奪舍禮何以治之靈公壺範不脩父子相夷惟其無禮也俎豆禮器也事陳設之事也軍旅亦陳設之事也明乎禮儀三千三百則軍旅行伍粗迹也以爲陳則湯武之師也易云師出以律律禮也記云軍旅有禮則武功成善將者敦詩書而悅禮樂

于樽俎之間而已。故雅歌投壺射不穿甲者爲世  
將。豈非俎豆軍旅事本無二乎。其明日遂行何也。初  
夫子去魯居衛最久。所以啟沃靈公者。計無弗詳。使  
公能用。豈待今日。使公知夫子何發此問。夫子久于  
衛。以靈公際可。庶幾知禮者。雖不能用。猶重所學。今  
據所問。則趣舍頓違。衛政流散。而君所好。又若此。去  
所以決矣。未幾而南子宣淫。蒯賁謀殺靈公。死輒父  
子操戈好戰無禮之流禍。聖人知幾其神矣。去衛將  
適陳入楚也。是時楚昭王聘夫子。夫子將往。而陳蔡  
畏楚。以兵圍之。七日糧絕。子路愠見不平之意見于

色也。君子亦有窮乎？言爲善者未必得福，怨天尤人  
之意。而夫子之答甚悠然。君子固窮，言時運有否，泰  
聖賢不能違也。如湯囚夏臺，文王囚羑里，周公居東  
安，能必所遇皆通，但能知命順受，不若小人窮則放  
溢爲非耳。大抵詘伸有定數，卽是定理。君子視理數  
爲一，故順理以忘數；小人視理數爲二，故逆數以違  
理。

俎豆之事，卽是禮。非謙辭也。凡禮可學者，皆是器數。  
聖人周旋中禮，非盡由學。學則必自俎豆之事始。  
陳字从阜，从木，申聲。中原地名。大昊伏羲之墟，木德

之君故从木伏羲都陳始畫八卦卦有行列世  
軍旅行列曰陳卦畫成于三故兵有天時地利人和  
韜畧家謂之三陳日月星辰斗柄左右向背爲天陳  
丘陵水泉據高依險亦有前後左右爲地陳車馬士  
卒行伍聯絡爲人陳又有八陳天地風雲爲四正龍  
虎鳥蛇爲四奇以象八卦李靖謂八本爲一天地本  
乎旗號風雲本乎旛名龍虎鳥蛇本乎隊伍之列後  
世詭設物象要不止八耳自黃帝始爲井田之法以  
制兵并分四道八家處其形開方爲九五爲陳法四  
爲間地所謂數起于五也虛其中大將居之環四面

諸部連繞所謂終于八也及乎變化制敵紛紛紜紜  
鬪亂而法不亂渾渾沌沌形圓而勢不散所謂散而  
成八復而爲一也周之始興太公繕其法以勝殷太  
公沒齊人得其遺法管仲脩之所謂節制之師也李  
德裕云兵之有節制猶一身筋骸之束以身運臂以  
臂使指屈伸把握無不在我然後可以應物捍患自  
什伍積而總以偏裨又總以將又臨之以大將尊卑  
相統進退緩急一聽大將之節制有犯無蔽故連百  
萬之衆可使如一身手足相須頭尾相應則戰必勝  
攻必取

萬有二千五百人爲軍卽鄉遂夫家之數也五百人爲旅黨鄙夫家之數也古之征役家出一人○俎以載牲體熟于鼎而載于俎祭饗之器也記云鼎俎奇而邊豆偶陳設之數也法詳儀禮凡爲俎以骨爲貴賤殷貴髀周貴肩貴者取貴骨髀者取廉骨又云俎有虞氏以梲夏后氏以楨殷以柶周以房俎四足如几曰梲施橫木于足曰楨柶屬形如蒲扇足間橫木曲撓如椹也俎下有跗如室曰房禮有俎則爲盛饌獻酬畢則徹俎而後安坐豆見第八篇孟敬子章



子曰賜也女以予爲多學而識之者與對曰然非與曰非也予一以貫之

聖人未嘗不識默而識之也未嘗不多一以貫之也默識卽一貫若憑耳目見聞一一存記以爲識功勞而去道遠矣然其教人曰多聞多見博文好古何也學不厭多惟有所以貫之者如樹根著土千枝萬葉暢茂條達生意壺壺何病于多無所以貫之者如草木無根枯枝朽幹與性命何涉子貢多學夫子詰而醒之子貢乍聞對曰然卽平習見解旋疑旋問夫子爲決其非蓋學如子貢識亦多矣正宜反約若初學

孰空寂適以成其固陋聖人亦不遽以此語之也大抵學貴會通偏于不多則一所貫何物一不離多多卽是一非謂多學而後一貫如後儒格物久豁然貫通之說也亦非謂先一貫而後多學如二氏旣得本莫愁末之說也苟會其通多卽一一卽多孟子云學問之道無他求其放心而已矣卽此理

朱子謂曾子一貫以行言子貢一貫以知言知與行離非聖人文行博約一貫之本旨也聖學知卽是能舜以大知爲行顏子以擇守爲知說詳中庸知而不能不爲知虛解識情耳卽如世儒云先明諸心知所

往然後力行求至強分爲二然一貫終不可分爲二也一貫心也知心之神也知可以名心行不可以名心知可以一知貫萬行行不可以一行貫萬知也分子貢通達爲知曾子篤實爲行支離矣又分子貢一貫爲語知曾子一貫爲語行支離尤甚矣曾子篤實力行故真知承教卽唯子貢不行知未實踐故揣摩生疑曾子學有得故語以吾道子貢道未得故語以子學語子貢一貫者學問之方答問之教也語曾子一貫者傳心之要時雨之化也機緣境地未可相比或云子貢已會其旨但方聆聖訓遽應否非對師之

禮故先應然。繼曰：非與？猶司馬遷唯唯否否云爾。鑒  
諸也。聖人以一貫呼賜與呼參，自不同。不得謂子貢  
之對與曾子之唯無異。蓋此章與下章皆承上在陳  
夫子嘗問子貢與子路云：匪兕匪虎，率彼曠野。吾道  
非與？二子皆不達，故于此呼賜教之一貫呼由教之  
知德。事詳家語。子貢平日多學，億中。子路平日聞善  
斯行，祇可無事敷演。臨危茫昧，因心境未融，學無根  
柢，故平各頂門著針，與呼參應唯，不可同日語也。後  
儒以致知爲入門，正坐多學而識之病，與聖教相戾。  
乃援大學致知在格物解，非也。詳禮記大學篇。

子由知德者鮮矣

知非見聞記憶也。天靈惺惺與性地相映徹曰知德。德卽性所具之理。仁義禮智是也。知卽本體之不受障蔽者耳。明曰知得曰德。無所得而言知。識情耳。神明默成乃爲真知。子路聞善必行。聞過則喜。然皆滯于口耳見聞而反觀性地未得融通。事未免捏抗。故有怨天尤人之意。皆由天明未徹。義理得心者淺。莊周云。宇泰定者發乎天光。無所得而稱知。天下皆是也。餘詳上章。

知者心之虛靈。德卽虛靈中皆備之理。知明則理顯。

如水清則魚現。中庸所謂天下至聖聰明睿智則容  
執敬別以時發見。志氣清明則天理流行。顯仁藏用  
時措咸宜。而無入不自得矣。人有良心皆有此德。惟  
知體未瑩。內昏于欲。外奪于感。愚不肖者日用而不  
知其賢智者。又蔽于多知。蓋緣下學未達。涵養未融。  
舉其所自有者自欺。荒失遺忘。天下皆是也。孟子云。  
凡有四端于我者。知皆擴而充之。無納交要譽。種種  
私意。如孩提之童。不學不慮。而知愛知敬。方爲知德。  
聖人所以貴默而識之。無思無爲寂然不動。感而遂  
通天下之故者。此也。勇者氣浮鹵莽。苟能反觀虛靈。

言言言角  
之地醒然自覺其所固有者則天定神怡何窮之足  
愠乎

子曰無爲而治者其舜也與夫何爲哉恭己正南面而  
已矣

此言舜遭遇之隆揖讓而有天下又得羣臣之助也  
與爲政以德譬如北辰意殊古今帝王多矣獨舜以  
匹夫受禪無開創之勞故曰無爲分命九官十二牧  
二十有二人師師布列如四體奉元首庶事惟康故  
曰無爲而治二意兼重夫何爲哉承無爲言不事創  
造也恭己正南面承治言得賢自輔也恭己者端冕

疑旒垂衣拱手之貌。正向也。猶正牆面。正首丘之正。人主向明。故正南面。恭已正南面者。無爲而治之象也。而已矣者。他無所事也。苟無爲而不治。雖與之天下。不能居也。舜所以無爲而治。有股肱耳目翼爲明聽之助也。故曰。恭已正南面而已矣。言有人爲之北面者也。堯以前。禹以後。有舜之德。或無舜之遇。有舜之遇。或無舜之諸臣。若但謂得人。雖堯亦然。而天下猶未平。若謂德盛民化。三五帝王皆然。若謂紹堯禹不紹舜乎。而羣工師師視唐虞之際。則不無少讓矣。夏后氏之天下。因舜之治也。故無爲而治者。莫如舜。



湯武征伐不免有爲桀紂無良輔故至于亂三代以後天下日多事矣故聖人謂韶盡善武盡美舜臣言治武臣言亂此也

按虞書舜省方覲岳濬川封山肇十有二州備極勤勞而夫子稱其無爲禹胼手胝足孟子謂行所無事此執中精一之理猶夫子誨人諄諄自謂無言學無不博自謂不多此默識一貫之旨也二氏襲取爲清淨澹泊黜耳目墮肢體以希無爲庶事叢脞必自此始聖人不以幾康廢兢業不以枯寂爲無爲

子張問行子曰言忠信行篤敬雖蠻貊之邦行矣言不

忠信行不篤敬雖州里行乎哉立則見其參於前也在  
輿則見其倚於衡也夫然後行子張書諸紳

行猶往也言利有攸往也士君子所與天下相通者  
惟言行易曰言出乎身加乎民行發乎邇見乎遠出  
其言善千里之外應之不善千里之外違之言行君  
子之樞機榮辱之主也而誠敬爲本心苟極誠極敬  
將何言非嘉言何行非美行信則人任禮則人答精  
白醇懿之至可以貫金石孚豚魚而無遠不行矣不  
然虛僞放肆出門卽礙焉往而可行哉忠信卽誠也  
口然而心不然是不忠也口然而事不然是不信也

篤厚重也。厚重者不輕佻。自不放肆。忠所以爲信也。篤所以爲敬也。不忠則不信。不篤則不敬。非四也。忠信在行亦敬。篤敬在言亦誠。各矯所蔽。其心一也。心非可以存亡。作輟襲取。而望其遽行也。居常惺惺。歷歷。惟誠惟敬。如或見之。言出口。行出身。無須臾離。此誠此敬。亦無須臾離。立在輿。隨時隨處也。未行則立。由立斯行。參猶對也。輿車箱也。在輿卽行也。倚依也。衡車前橫木。駕馬者見如在也。顧諟之意。其指忠信篤敬。神凝而成象也。因問行。故借車以喻行也。行必先立。立誠立敬。乃行之本也。參在立前。衡在輿前。隨

在至近也。參前又倚衡言自立至行無往非誠敬也。如此積累然後至誠至敬言行可動天地而利有攸往也。子張書紳學爲參前倚衡也。然真見忘象執象學象終象而已也。大抵學問之道無過事心存心之地無過言行離言行則枯寂心無所用。聖學謹言慎行便是元亨利貞之道。二氏無如心何爲存想止觀持偈看話頭種種旁門以至面壁枯坐艱難蹇蹇一步不可行及其立言馳騁誇誕哆口浪說全無忠信篤敬之意。六經之言所以天下古今由之而無敝也。

○周禮大司徒六鄉之內凡二千五百家爲州六遂

之內二十五家爲里。詳第六篇。南裔曰蠻。北裔曰貊。鼎立曰參。參三也。曲禮。離坐離立。無往參焉。離麗也。言兩人並坐並立。一人往則成三。中兩爲參。易云。參天兩地。中庸云。與天地參。此言我與忠信篤敬對立成三也。衡見第三篇。紕見第十篇。書卽字也。說文云。書著也。著之竹帛也。或云。書如也。寫言如意也。或云。庶也。紀庶物也。上古無文字。自黃帝始而無紙書於竹木曰簡。詩云。畏此簡書。伏羲始造書契。合木書其側曰契。文字非自伏羲始也。緯書云。奎主文章。蒼頡類象奎星屈曲象文字。蒼頡黃帝史也。感鳥獸蹄

跡而知文理相別。依類象形作篆謂之文。其後形聲相益謂之字。字者孳乳而浸多也。著于竹帛謂之書。代易體更至周宣王時。史籀宙作大篆。謂之古文。七國時文字乖別。秦李斯奏蠲罷不合秦文者。作蒼頡篇。中車府令趙高作爰歷篇。大史令胡毋敬作博學篇。皆取史籀大篆省改。所謂小篆也。時官獄繁。趣省約。秦下邳圭人程邈始作隸書。古文由此息。秦羽人上谷王次中作八分書。漢黃門郎令史游作章草。故秦漢時書有八體。一曰大篆。史籀作。二曰小篆。李斯等作。三曰刻符。施于符傳。四曰摹印。卽繆篆施于印。

重五曰蟲書爲鳥蟲形施于幡信六曰署書用于門  
題七曰殳書銘于戈戟八曰隸書卽程邈作用于官  
府至王莽時甄豐刊定六體一曰古文卽蒼頡文也  
二曰奇字古文奇異者三曰篆書卽小篆四曰佐書  
卽秦隸書又謂之漢草官府隸人佐書用之五曰繆  
篆卽摹印六曰鳥蟲卽蟲書至魏晉以後復有篆書  
飛白金錯懸針垂露蚊脚等法皆因事變體隨義立  
名今世隸書卽秦之八分書今楷書卽秦之隸書與  
漢草書也今之草書卽魏晉以來之草書書雖多名  
體不離八八體不越六義卽周禮保氏六書一曰象

形如日字形滿月字形闕之類二曰會意如人言爲信止戈爲武之類三曰轉注如考西轉爲老老東注爲考之類四曰指事如人在一上爲上在一下爲下之類五曰假借如令善之令作令使之令生長之長作長短之長之類六曰諧聲形聲相合成字如江河之類水爲形工可爲聲左形右聲也鳩鴿之類鳥爲形九合爲聲右形左聲也婆娑之類下形上聲也草藻之類上形下聲也圍國之類外形內聲也衡行之類內形外聲也鄭玄謂五書有窮諧聲無窮五書尚義諧聲尚聲古人音書祇爲譬況之說隨宜制用自



沈約爲四聲而韻始興孫炎爲反語求韻學究之家  
造三十六字母十三門切法此華人讀佛書譯梵語  
而作也本皆華字華音而說者謂爲傳自西域謬也  
鄭玄謂梵人長于音從聞入華人長于文從見入附  
會之說也佛家謂耳目圓通見聞思脩以論明性非  
論文字也大段華言清徹一字一音梵語侏儻粘帶  
數字始可了一音讀梵書學梵語不得不隹文字求  
聲音耳豈謂華音不如梵語乎世俗儒者生長中國  
學聖人雅言讀六經文字甚平正易簡苦被四聲纏  
繞牽強穿鑿于名理無當而吹毛數沙此同彼異紛

如聚訟然五方土音人氣發響輕重疾徐清濁難同  
竟無歸一嘗觀六經用字轉移通融貴義合不貴本  
字風雅具在原無四聲而天然逸響未如今學究家  
之煩且拘也故淮南子謂蒼頡始作字天雨粟鬼夜  
哭蓋文字興而巧僞多使人廢業勞苦饑餓故粟須  
天降鬼神無所匿其情狀故夜哭今六書諧聲之類  
也或云鬼當作兔愛其毫故哭

子曰直哉史魚邦有道如矢邦無道如矢君子哉蘧伯  
玉邦有道則仕邦無道則可卷軫而懷之

史魚衛大夫名鮪家語云蘧伯玉賢而靈公不能

用彌子瑕不肖而信任之史魚驟諫不聽病革命其子曰吾生不能進賢退不肖以正君死無以成禮置我尸牖下其子從之靈公來弔怪而問之其子以對公命之殯遂退彌子瑕用蘧伯玉孔子聞而直之春秋傳魯襄公十四年衛孫林父甯殖謀逐獻公以告蘧伯玉伯玉曰君制其國臣敢奸之遂行二子竟逐獻公立公孫剽後十年甯殖死其子甯喜爲政獻公求復喜又謀弑剽問于伯玉伯玉曰瑗不得聞君之出敢聞其入遂行甯喜竟弑剽而復獻公焉或曰史魚尸諫誠直矣伯玉立視亂賊不能討又不終去以

世儒說春秋之法律之爲得爲君子曰聖人論事本  
人情酌時勢不求人以所不能不輕責人以必死如  
晏嬰于崔杼蘧伯玉于孫甯雖不能寢其謀討其罪  
而能以其身蕭然于事外既不墮亂人之黨亦不蹈  
刑戮之禍詩云旣明且哲以保其身亦庶幾矣向使  
伯玉無見幾之明觀望于事前染指于事內欲免得  
乎二子之賢皆于無道時見靈公無道云有道者自  
初年言也無道如矢則不卷而懷卷而懷是不必如  
矢也聖言以伯玉爲優氣節挺勁曰直德性圓融曰  
君子卷懷雖存乎已亦有欲卷不可得者平日鋪張

大過臨危收斂不及故機不在卷時而在仕時可以張而開亦可以卷而收此際有權如矢則猶執一也然學史魚易學伯玉難學史魚不成不失爲直學伯玉不成去君子遠矣

子曰可與言而不與之言失人不可與言而與之言失言知者不失人亦不失言

此章主教者言學不進亦由教不善也其人正可與言者而遲吝不與言便是錯過此人如不可與言而輕發強聒又是虛費此言二者總爲不知人故各有悔若智者于人之賢愚燭照分明自不至錯過言必

投機啟憤發排可上可下宜語宜默自不至虛費蓋  
教學本相因言與人應斯爲兩得反是則兩失其人  
天資學力如此我啟發開導適應如此此惟教者神  
明默識見道精徹幾微肯綮處不差乃能善巧方便  
發無不中若理路生疎見少疑室先後緩急不調必  
有人言相左之病中道躍如非哲匠不能也試撿篇  
中夫子與諸子語人入中窾言言破的學者遇此真  
無方之益七十子遭逢千古無兩顏淵所以喟然歎  
善誘也惟曾經苦心教人者知聖言之微

人與言非對舉所重在人言之得失因于人與一人

言亦有不可。如當與而不言。空過一賢者。不當與。遂絕口不言。亦空過一來學。均爲失人也。下士語。上是失言。下士語下。不投機。亦是失言。如葉公問孔子於子路。子路不對。非必葉公定可與言。然不言亦是失人。宰我對使民戰栗。非必哀公絕不可與言。但妄對亦是失言。主授者謂之言。主受者謂之人。兩相得。則教成家語。子云。非其人。告之弗聽。非其地。樹之弗生。得其人如聚沙而雨之。非其人如會鼙而鼓之。此之謂也。

子曰。志士仁人。無求生以害仁。有殺身以成仁。

此言仁義一理。義卽所以成仁。天地生氣爲仁。殺氣爲義。在人德愛爲仁。而德以刑成。以愛虧。故義所不敢者。卽仁所不安也。志士卽義士也。志士仁人。非兩人也。謂有節槩之仁人。非巽懦之仁也。仁者誠不爲慘礪以傷生。而志立。必不苟且以避死。仁人心也。人之生也。直。周之生也。幸而免。當死求生。則形存而心死。爲亂賊以害仁。當死殺身。雖形毀而神全。爲忠貞以成仁。夫身旣殺矣。仁何以成。蓋忠臣孝子。英爽不磨。與日月同明。山河同永。千萬世人心。卽仁人之心。眞是不朽。卽仁人不朽。正氣常伸。卽仁人常在。比干



龍逢、伯夷、叔齊至今未死也。張子厚云：聚亦吾體，散亦吾體。知死之不亡者，可與言性。此之謂也。而皆成于有志，爲仁無志，頽靡而不奮發，闕畧于檢押，而脂韋爲博大，仁之蠹也。故曰：苟志于仁矣，無惡也。或云：管仲不死，夫子又以爲仁，何也？曰：子糾非君也，管仲非臣也，不死未爲害。仲不死而功在天下，雖不殺身而仁亦成矣。此章之意，甚言爲仁不可無志，非徒責人殺身耳。

子貢問爲仁。子曰：工欲善其事，必先利其器。居是邦也，事其大夫之賢者，友其士之仁者。

問爲仁與問仁異仁德也爲仁功也故借工事以喻  
工匠人也事造作也利銳也器斧鑿之屬也仁惟此  
心心無所觀法悠悠濟俗欲不淪于匪彝難矣居是  
邦謂隨處求益也大夫曰賢謂在尊位有才德聞望  
者也事承式也分隔而禮恭故不必知其仁士曰仁  
謂涵養蘊藉道德純粹者也友親也同志曰友志同  
交深故必擇其仁乃可友也士與庸衆人處則臨深  
爲高承奉媚悅者多而長驕惰之習與賢士大夫處  
則矜式嚴憚退然知己之不足而觀摩以化所謂置  
之莊嶽之間而齊語入芝蘭之室而自芳此爲仁之

利器也。夫子嘗云：商也，日益；賜也，日損。子夏好與賢已者處，子貢悅不若已者。故於此藥之，王安石云：事衰世之大夫，友薄俗之士，聽淫樂，觀僇禮，欲皎然不惑于先王之道，難矣。徐幹云：賢者言足聽也，貌足象也，行足法也。加乎善獎人之美，好攝人之過，我之憚之。若嚴君在堂，而神明處室也，欲爲不善，其敢乎？顏淵問爲邦，子曰：行夏之時，乘殷之輅，服周之冕，樂則韶舞，放鄭聲，遠佞人。鄭聲淫，佞人殆。

他人問政，顏子問爲邦，卽問治天下也。天子地方千里，曰邦畿；大曰邦，小曰國。顏子功深養到，其于立本

致用精微處已分明。惟是綱紀法度尚須商確。故夫子包舉虞夏殷周四代廣論其大體。規摹不在多言。聞一可知十矣。夏取時則凡釐工熙載敬天勤民之事可知。殷取輅則凡百工制作之類宜崇儉朴可知。周取冕則凡貴賤章服之類宜辨等殺可知。樂用韶舞則明良喜起風動無爲之氣象皆可知。此其大法也。亦有大戒邪正不容並立治亂之關也不正之聲不入于耳不正之人不近于側則慎終如始立道醇而上理成矣。淫蕩也非男女之謂也。鄭聲靡曼聽之使人流蕩不檢故曰淫巧佞善柔之徒使人盡其中

而不覺故曰殆殆者傾危之意自古英君諄諄不患  
德業不就惟于聲色小人契緊隄防斯善政克終所  
以刀劍戶牖念其亡之戒卽此意也此皆根本道德  
而見諸施爲非無體之用行夏時者先後欽若奉天  
無私心也乘殷輅者出往遊行不敢馳驅之心也  
服周冕者齋明盛服非禮勿動之心也天用莫如時  
地用莫如車人用莫如服三事兼三代隱然戴履  
地首庶物垂衣裳中心無爲以守至正之軌範也非  
制度損益之迹耳聲樂爲耳目之娛而雅則昭德邪  
則蕩心用人爲立政之本而忠則弼諧佞則亂德性

情宜養以和平左右宜輔以正人天德王道顯微一  
貫惟顏子乃可語此他人聞此不謂浮蔓無本則謂  
好大迂闊學者默識可也夫子嘗自言用禮樂從先  
進夏商之禮自謂能言苟有用我損益可知而于此  
畧露端倪屬望顏子大矣凡篇中與顏子語博大精  
微語爲仁精微而又博大語爲邦博大而又精微所  
以初

行夏時譌以斗柄初昏建寅之月爲歲首也自唐堯  
命羲和曆象日月星辰敬授人時所定四仲卽今建  
寅之時也歲序與時令脗合虞因之不獨夏耳湯革

夏命以十一月爲歲首示更新也周革商命又以十月爲歲首故易革之彖曰湯武革命象曰治曆明時取革故易新耳非如緯家言天開地闢人生三正之謂也正自宜建寅春秋世用周正故曰行夏之時也車以引重致遠堅緻爲貴殷以前皆木車無文飾周飾以金玉奢而易敗故宜從殷也章服以冕爲首虞曰皇夏曰收殷曰皐周曰冕制有詳畧惟周冕盡制有垂旒蔽前有黹纁塞耳於端默居上最宜朝祭大禮大夫以上皆用之而旒小異耳鄭玄解禮謂專爲祭服未然大段天子之事莫大乎奉天故首舉時以

樂庶政天下名器莫重于車冬官掌之故次舉輅以該百度貴賤物采莫先于服故次舉冕以該章服三者皆禮之屬也移風易俗莫善于樂則法也韶舜樂也舞樂容也拊石之詠蹌蹌之舞喜起之歌無靡曼之聲無妖冶之容則其美善非則其聲容也凡樂出于中正和平者皆韶舞也出于唐虞好義者皆鄭聲也放屏去也鄭國名也其土音柔曼凡聲音不正者稱鄭聲非獨鄭有此聲耳朱子据此以鄭詩二十一篇皆爲淫樂誤也說詳詩蓋聲者音也詩者辭也音猶今唱曲之腔詩卽腔中之辭腔有南北辭惟



所用聲雖鄭而詩本無邪。非聲淫而詩皆淫也。如鄭詩皆淫。夫子何取而存之。存者淫詩刪者又何詩邪。淫殆二字。意畧相彷彿。水平溢曰淫。考工記云。善防者水淫之言。水泛行動蕩。不衝突也。鄭聲柔曼動搖人心。亦曰淫。殆近也。危也。詩云。勿小人殆。小人狐媚。于虺蛇。使人易近而險。故曰殆也。

行夏之時。謂凡舉大事。依夏時行也。時惟有建寅。無所謂三正也。天開地闢。人生三正者。術家之說也。十二辰布列地四維。天運于外。晝夜不息。北極爲天樞。環北極爲紫微垣。垣側有北斗六星。在垣之內。杓在

垣之外以運陰陽定辰次行四時每初昏時杓所指之方爲建以所建之方爲月之辰如杓指寅則其月建寅十二辰皆以次定爲四時而建寅爲春首則寒暑節候皆適中是以堯命四官鳥正于仲春舜巡四嶽按四仲至夏不改非夏始爲此正也及湯有天下遇十二月朝諸侯頒政令而是月適建丑此後朝正遂以爲常期非爲地闢于丑故用爲商正也及武王伐商歲在鶉火月在天駟日在析木之津後三日得周正月辛卯朔是爲建子之月遂以子月朝會諸侯卽位稱王因以爲常期亦非爲天闢于子故用爲周

正也。而春秋公羊氏謂夏以建寅之月爲正，平旦爲朔，殷以建丑之月爲正，雞鳴爲朔，周以建子之月爲正，夜半爲朔。蓋附會之說。而術家謂子當夜半，則屬來日子丑之月，則屬來歲。故朱子謂三正皆可爲歲首。夫聖人治曆明時爲民事也，開物成務以宜民爲本。日出二刻半爲明，豈子丑幽昏遂爲作事之期乎？商周雖正月用子丑，而四時之序，巡守祭祀曆象授時，未嘗改也。豈得以建寅獨爲夏正乎？

輅與路同，以道路得名也。大道曰路，可容三軌，故路言大也。君門爲路門，君車爲路車，君寢爲路寢也。車

之制其來已久。易云：黃帝堯舜服牛乘馬，引重致遠，以利天下。虞舜車服以庸。古車用木，至商不改。至周始有五路。曰：玉曰金曰象曰革曰木。玉金象以爲飾也。革以皮鞮而漆之。木漆而不鞮。天子兼用五路。惟王路爲乘輿。金路以賜同姓。象路以賜異姓。金象在天子爲綴路。先路而諸侯受之，則皆謂大路也。

黃帝始作冕。凡首服三等。冕最貴。次弁。次冠。上古冠小，僅撮髮。貴賤咸用之。弁大于冠，圍額。冕則加板于上，垂旒前後以蔽目。左右有黹纁以塞耳。人主戴此。凝神恭默，俯臨天下，曰冕。冕之言俛也。居高而視卑。

也制雖創于古法莫備于周據周禮天子冕十二旒  
祀昊天上帝則冕而服大裘祀五帝亦如之享先王  
則袞冕先公鷩冕祀四望山川毳冕祭社稷五祀絺  
冕羣小祀則玄冕是冕爲祭服也而王制云有虞氏  
皇而祭夏后氏收而祭殷人皐而祭周人冕而祭皇  
收皐皆弁也殷以前或冕制未備或冕以朝不以祭  
故弁冕無等至周始重冕卿大夫以上助祭始得用  
之禮雜記云大夫冕而祭于公弁而祭于已士弁而  
祭于公冠而祭于已尚書顧命自王以下至大宗皆  
麻冕又冕者五人分立于堂階等處則冕不止天子

服之亦不獨祭用之矣。冕雖同而旒異。天子衮衣之冕十二旒。每旒貫玉十二。上公衮衣之冕九旒。侯伯鷩衣之冕七旒。子男毳衣之冕五旒。孤絺衣之冕三旒。卿大夫玄衣之冕二旒。各玉數如其旒數。九旒則旒九玉七旒旒七玉。餘倣此。貫玉用采絲曰縹。縹與藻通。冕上橫貫以簪曰笄。笄上繫組爲紘。自左下遶頤。右上屬于笄。垂其餘爲飾。

鄭國姬姓。伯爵。周宣王封其母弟友于鄭。是爲鄭桓公。在今陝西西安府華州城北。古鄭城。幽王有犬戎之難。桓公死之。其子武公從平王東遷洛。因徙其民。

于號鄆之間遂有其地謂之新鄆卽今河南開封府  
新鄆縣東周畿內之國也後爲韓哀侯所滅地當濟  
水之西洛水之東河水之南潁水之北土淺氣浮其  
人聲音靡曼故凡聲不正者謂之鄆聲非詩之鄆風  
也亦非定指鄆一國之聲也如學齊音者謂之齊語  
學楚音謂之楚語云爾豈獨鄆有是樂而他國蓋雅  
樂乎

子凡無遠慮必有近憂

無遠慮不曰有遠憂而曰有近憂者言不測也慮不  
言近近則非慮憂不言遠遠則不憂居安而不慮危

危卽生于安處治而不慮亂亂卽伏于治故曰慮不  
遠愛必近也慮者預備非虛慮也凡造化人事憂樂  
相循利害相倚日中則昃月盈則虧自然之數能慮  
則神明常醒灼見消息盈虛之理不敢爲貴盈履滿  
之事兢業早圖則造化可回雖氣數有固然而意外  
卒至之患無矣

子曰已矣乎吾未見好德如好色者也

第九篇內言未見猶有屬望之意此言已矣乎則絕  
望之辭矣好德好色二者之心人所同有好德天理  
之自然而色常奪之好色人欲之熾然而惟德能克



之色緣目入見可欲則心亂是以色易德也心之官能主非禮勿視卽好德如好色矣

天理人欲同出而異情男女之欲天之性也不通于化生之理是無人道也故天下無不好色之人情然未有好色而不妨德者但能好德如色則人欲卽天理又烏得謂好色乎故聖人不能使人不好色而但病其不好德道不遠于人情也

左傳秦晉和視晉平公疾曰不可爲也是謂近女室疾如蟲非鬼非食惑以喪志公曰女不可近乎對曰節之先王之樂所以節百事也故有五節遲速本末

以相及中聲以降。五降之後，不容彈矣。於是乎有煩  
手淫聲，慆堙心耳，乃忘平和。君子弗聽也。物亦如之。  
至于煩，乃舍也已，無以生疾。君子之近琴瑟，以儀節  
也，非以愔心也。天有六氣，降生五味，發爲五色，徵爲  
五聲。淫生六疾。六氣曰陰陽風雨晦明也，分爲四時。  
序爲五節。過則爲菑。陰淫寒疾，陽淫熱疾。風淫末疾，雨淫腹疾。  
晦淫惑疾，明淫心疾。女陽物而晦時，淫則生內熱，惑  
蠱之疾。今君不節不時，能無及乎？曰：何謂蠱？對曰：淫  
溺惑亂之所生也。於文皿蟲爲蠱，穀之飛亦爲蠱。在  
周易，女惑男，風落山，謂之蠱，皆同物也。

子曰臧文仲其竊位者與知柳下惠之賢而不與立也  
柳下惠之不見用何獨罪一臧文仲蓋在他人或不  
及知知而力不能舉文仲號爲賢者與惠生相知惠  
爲士師三黜文仲爲政曾不能伸汲引之力廣同升  
之量使沈淪小官終身阨窮是亦文仲之罪也及文  
仲死諡曰文文者光明俊偉之稱陰蔽人之賢而惟  
恐逼已穿窬之心何以爲文視衛公叔文子有餘媿  
矣齊晏平仲楚令尹子西知夫子而阻其進皆此類  
也

柳下地名惠諡也展氏名獲字禽或云家有柳身行

惠故以稱嘗爲魯士師。士師獄官也。周禮天子之士師則下大夫諸侯之士師則士也。如孟氏使楊膚爲士師。大夫之僚屬耳。故孟子云柳下惠不卑小官。其未嘗爲大夫可知。朱註謂爲魯大夫。然則不爲不與立矣。或據魯隱公九年大夫無駭賜姓展氏以爲無駭之後。夫世官必以適展禽稱季。非適也。或以柳下爲其食邑。則所居地名耳。或據禮死有諡則生爲大夫。據烈女傳其妻諡之。非魯君諡之也。蓋魯以諸侯僭天子。三家以大夫比諸侯。故大夫之屬皆稱大夫。檀弓陳子車死。稱其宰爲家大夫。卽此類。然不可謂

之魯大夫矣

魯僖公二十六年齊侵魯公使展喜受命于展禽以其言論齊師齊師退又齊人求魯岑鼎魯與之展禽微言于展禽展禽曰吾亦愛吾鼎又臧文仲祀爰居展禽非之文仲曰季子之言不可不法也書之以爲三策又夏父弗忌躋僖公于閔公上展禽曰必有殃凡此皆文仲時事故宜知其賢

子曰躬自厚而薄責於人則遠怨矣

躬自厚謂責己厚也責己厚自不求備于人故曰正己而勿求于人則無怨凡怨生于責人厚責人厚生

于責已薄。怨非處世之道也。有怨卽是學問之障。我無怨于人人。亦無怨于我。故語爲仁在家邦。勿怨大道不離涉世。豈弟樂只斯爲君子。今人以任怨爲能事。以避怨爲達世學。所以弊德所以孤也。惟孟子仁禮存心之說。深得此章之旨。釋氏以涉世爲煩惱。由未知遠怨之道耳。宋呂伯恭性下急。一日誦此章。忽覺忿懣冰釋。朱子曰。學如伯恭。方是能變化氣質。

子曰。不曰如之何。如之何者。吾末如之何也已矣。

如之何。如之何者。心口自審之辭。心之官則思。思曰。庸。庸作聖思者。聖功之本人。心之神用。則無所不通。

不用則昏迷莽蕩無適而可以爲學則不憤不排教  
無可施以處事則不量不慮禍患立至蓋其氣盈而  
直諫之則必拂其心蘢而諷諭之則不悟將如之何  
而可惟有瞿瞿良士溫溫恭人思之思之又重思之  
所以德無不立事無不成也此章爲鹵莽滅裂者言  
若優游不斷朋從爾思亦復如之何

子曰羣居終日言不及義好行小慧難矣哉

君子以文會友以友輔仁不然寧離羣索居猶可以  
獨善若聚衆羣處自朝至暮恣譴浪之語營機巧之  
事率此以往良心怙于旦晝禽獸不遠惛淫卽于匪

人損傷必多以求進德脩業如北面走而望衡山故曰難矣哉

子曰君子義以為質禮以行之孫通以出之信以成之君子哉

此專為行禮者言義者宜也質正也射之的也正鵠曰質儀禮天子熊侯白質諸侯豹侯赤質周禮司弓矢職射皮革楛質是也言禮主于義猶射主于質三千三百皆先王以義化裁因時變通非以繁文拘節為模倣也時勢有古今泥故常彌文非達禮之本者禮本諸義記曰禮也者義之實協諸義而協雖



先王未之有可以義起也善用禮者斟酌損益本諸  
天理人情因時勢而品節之雖不盡合前人而有物  
有則亦自曲中故禮者履也行乎其義者也退讓所  
以明禮其出之必以孫焉忠信所以崇禮其成之必  
以信焉如是豈不彬彬質有其文之君子哉今學禮  
者求諸禮而不求諸義所謂非禮之禮大人弗爲何  
以爲君子二十篇中言禮不一而竟不言禮之節文  
其意可知後世禮家泥古非今穿鑿附會爲不知義  
耳

道莫大于禮教莫大于執禮視聽言動孰非禮也聖

人自謂無行不與孰非禮也故曰禮云禮云玉帛云  
乎以此思禮禮可知也三禮非聖人考訂之舊矣載  
記所載尚存禮義若周儀二禮瑣瑣節目其義已微  
知其義則禮爲我用不知義膠柱鼓瑟圓鑿方枘何  
以行之哉義以爲質禮以行之兩言千古議禮之宗  
解者謂此章專爲義言誤矣

子曰君子病無能焉不病人之不知也

病猶患也已不能而人不知則當有見惡無聞之憂  
已能矣而人不知益徵遜世無聞之養君子篤志好  
學無時而可已也

子曰君子疾沒世而名不稱焉

君子誠不近名然世豈有申椒幽蘭而不芳洪鐘大鼓而無響者哉五霸之名君子恥之堯舜禹湯文武周公孔子今聞施于千禩亦君子所自期也生而無稱不輟自脩猶未爲患老將死而泯泯焉以沒謂君子不疾乎疾輕於病無能言病不稱言疾重在已也名者實之賓實必有主君子不病其無賓病無延賓者百年住世死同腐草可爲痛哭流涕長大息聖言繼藉但云疾耳

子曰君子求諸已小人求諸人

凡篇中言已皆教人理會自家事七尺之軀秉符含  
靈皆可以爲聖爲賢者而乃拋向萬物羣中莽莽蕩  
蕩醉生夢死真成孤負故聖人每教學者求已反已  
克已脩已正已不一而足已以內何所不具已以外  
更有何物求已外更有何事將自己精神收還自己  
腔裏幹辦自己事學問之道如此而已矣故夫有道  
之士泰山喬嶽以立身內常重而外常輕內重則惟  
見有已內輕則惟見有人君子見已有餘故一切求  
諸已已惟有餘所以爲大小人視已不足故外仰乞  
于人已惟不足所以爲小求已求人精神聚散不同

非但名實之謂耳。孟子云：曠安宅而弗居，放其心而不求，便是不知有己。故曰：學問之道無他，求其放心而已矣。將心安頓在己內，將己安頓在萬事萬物頭上，泛應酬酢，一一守己以立，稟己以行，盛德大業由此出。故曰：脩己以安人，安百姓為學實能求諸己自然見得己大，無處非己。聖人通天地萬物為一身，此也。佛氏謂十方世界是全身，蹈襲此理，但其所以求之方非也。

子曰：君子矜而不爭，羣而不黨。

執持曰矜，矜非美德，以其近千爭也。不爭何惡于矜。

今之矜也忿戾則爭矣儕俗曰羣羣非高行以其近于黨也不黨何妨于羣今之羣也濟惡則黨與衷世不離此二道尚異則矜尚同則羣矜而爭爲彊梁羣而黨爲鄉原君子平易近人涇渭攸分斯和衷之道矣

子曰君子不以言舉人不以人廢言

此聽言之法天下事理皆寄於言不言何以詢何以傳善言無窮不可棄也然言必有言之人采其言則姑置其人其言善吾用言耳非以片語樂生平而遂舉之也其人不善吾惟取其言耳敢謂過者無一得

而遽廢之乎。蓋人雖不肖。至于執言論理。往往皆中。不舉不廢。卽是一人。如楚申公巫臣。諫納夏姬。實自爲也。而以爲楚子則甚忠。其言烏可廢。其人亦烏可舉。求諫聞善者。自當如此。若夫用人。責實雖堯舜猶詢事考言。孔子于宰我猶聽言觀行。誠不主于言。而苟易堯可詢。狂夫可擇。又豈廢言乎。夫子稱南人之言。孟子稱楊虎之言。祭統引孔悝之言。大學述王孫圉舅犯秦誓之言。皆非以人也。如後世科舉文字。取士則舉人全以言矣。

子貢問曰。有一言而可以終身行之者乎。子曰。其恕乎。

已所不欲勿施於人

此士君子宅心處世易簡之方。凡取之有窮者不可  
以養久。人情有礙者一步不可行。惟恕之一言。因心  
及心。運量無窮。同好同惡。羣情大順。故一言而終身  
可以行之者。無喻于此。在他處言恕。并言忠。忠以盡  
恕。道近自然。是四教之全功一貫之旨也。此因恒情  
僞妄不忠。強恕以行。因人反己。及人私欲銅蔽。  
用此爲決藩破籬之法。以恕求忠。故但可謂之恕。雖  
忠言恕。故但可謂之一言。朱子謂言恕卽忠在內。則  
所謂一言者。包舉耳。終不得爲一言矣。大抵聖學以



求仁爲本仁之爲道也遠死而後已故曰終身忠恕  
卽忠信所謂立達俱而仁全也行恕所謂能近取譬  
爲仁之方也孟子謂強恕而行求仁莫近焉是也  
子曰吾之於人也誰毀誰譽如有所譽者其有所試矣  
斯民也三代之所以直道而行也

此夫子自明已志卽作春秋之義憎言曰毀悅言曰  
譽毀譽猶世儒所謂褒貶也聖人心同天地妍媸好  
醜物各付物無有作惡無有作好於誰毀譽乎然無  
譽而迹如有所譽焉者惡惡短也于人之惡諱而不  
揚有似乎譽非故私之有所閤試而不敢徑情也其

所以無毀譽者何也。大道爲公，千古奉一日惠夫。婦無是非之心，不可以爲人。今此之民，卽三代盛世所用以行其公是公非之道者也。禹湯文武已不能達民自用，吾何容私毀譽乎。亦大道爲公，與民共由而已。後儒說春秋，牽強穿鑿，作爲凡例，褒貶賞罰，恣行胸臆。蓋聞孟子云：「天子之事，詩張而失其解也。」孟子謂當世無天子。春秋所書皆禮樂征伐之事，云爾。豈謂仲尼自行天子之事乎哉。褒貶爲直是證父之子矣。說見春秋，故下章以史闕文類記之。

天下有公道，故聖人無毀譽。不言無毀譽而言誰毀

舉者指其人也二百四十二年間天子諸侯大夫皆是也譽與豫通悅也悅言曰譽詩云是以有譽處兮春秋爲亂臣賊子作本非爲譽如有所舉者深明毀之必無也有惡而不稱其跡似譽試猶考閱也考其事未真閱其人當隱非真譽之亦非泛然皆舉之也三伐所以行如孟子云國人皆曰賢然後用之國人皆曰可殺然後殺之民之所好好之民之所惡惡之也直道不言士大夫言民者蓬黎百姓日用不知所謂葛天無懷之民也若秦穆士大夫有直道則春秋可無作也故曰天下有道而庶人不誣直而聖人

所以行其道者甚委蛇故云父爲子隱子爲父隱直在其中矣是是非非因民之公損益筆削傳所謂微而顯志而晦婉而章盡而不汙懲惡而勸善其義則丘竊取之乃所以行此直道者也非聖人其孰能之  
子曰吾猶及史之闕文也有馬者借人乘之今亡無已  
夫

此因上章無毀譽類記之凡史皆紀惡垂戒而作也君子見人不善不欲出諸口故君父之惡常諱而不盡如春秋所書亂跡有傳詳而經反畧者若楚子圖弑鄭敖鄭駟弑君髡頑之類經皆書君卒因其事疑

而從輕也。周與魯事諱者尤多。皆闕如之義。夫子言古之良史。往往如此。已猶及見比及季世。訕謗詆毀。言人之惡。惟恐不盡。況肯闕乎。有馬者借人人借之。遂乘之。乘者不計其爲他人之物。借者亦不責其卽還。後世自私自吝。有者不必借。借者刻期歸。甚至有車馬人不敢借。無車馬者恥借。人人我。不勝町畦。世變可知。此亦好盡言人過之類也。

古者六書掌之。史官班固云。古制書必同文。不知必闕問之故。老此小哉。其言闕文也。吾猶及史之闕文者。夫子作春秋之本志也。史詳于事而繁于辭。辭勝

則掩義春秋据舊史編年紀事舉其綱不舉其目使  
觀者自考而義見是非之心人皆有之故春秋傳心  
而已者也知春秋莫如孟子云王者之迹熄而詩亡  
詩亡然後春秋作詩之溫柔與春秋之忠厚其仁同  
也詩有美刺春秋有是非其義同也幽厲以前有詩  
而美刺存東遷以後詩亡而是非隱故夫子因魯史  
作春秋始于隱公而夫子去隱公時已十一世矣史  
策所記二百年間空文已爲懸邈而況以己意增益  
之乎臣弑其君子弑其父大惡也國有亂政天下有  
亂人太不祥也不得已而書之策告天下後世爲臣

爲子與有國有天下者本非樂稱之也而敢附會之  
乎其自言曰惡稱人之惡者可以諒聖心矣故春秋  
與詩其溫柔敦厚同詩之美刺無美刺也春秋之是  
非無是非也所以謂闕如也今觀春秋所書十二公  
之事微而不彰其孰非闕文而儒者顧謂爲刑書字  
褒字貶詆春秋者也多爲條例深文巧詆如諸傳之  
隱刻與望人闕如之意大相左區區以夏五郭公爲  
闕文迂且陋矣愚于春秋蓋詳哉言之千載而得罪  
于說春秋者所不辭也

子曰巧言亂德小不忍則亂大謀

士君子進德脩業成敗之機不可不容非至明不能  
察疑似之惑巧言亂德也非至斷不能決猶豫之幾  
小不忍則亂大謀也君子居仁由義立忠立孝志本  
在德而佞人反覆陳說利害顛倒是非聽而不察必  
至翻然改節舉平生盡棄之不其亂德乎君子謀王  
斷國大計已定而貪小利畏小害狐疑不決蹉跎斯  
須之頃坐失萬年之機不其亂大謀乎然則進德脩  
業惟明惟斷乃克終朱子云如婦人之仁是也又云  
如匹夫之勇未然亂疑似也小不忍似仁姑息兩可  
故亂大謀如趙太后不忍長安君質齊劉先主不忍



取荊州之類。若匹夫之勇。一朝之忿。不忍卽敗。何但  
亂耳。昔人云。忍之一字。衆妙之門。別是一意。彼不能  
容忍。主義言此。不能安忍。主仁言。

子曰。衆惡之。必察焉。衆好之。必察焉。

衆好衆惡。與公好公惡不同。公者。取必于理。所謂仁  
人能好人。能惡人也。雖一人好一人惡。亦公也。衆者  
取必于同。所謂一鄉皆好。皆惡。同俗而未必同理。所  
以必察也。士君子處世。善者好之。不善者惡之。當然  
耳。至于衆則賢愚混淆。故必察其可好可惡之實。與  
好之惡之之人。求其當而已。非有心必與之相左也。

子曰人能弘道非道弘人

此責人體道也率性之謂道仁者人也合而言之道也道參天地贊化育盡人盡物可不謂大然皆人心精神所發越人能身體力行擴而充之有爲聖爲賢之人自有參天兩地之道未有塊然血肉之軀無異草木瓦礫而道自恢廓其身爲聖賢者也孟子云萬物皆備于我矣凡有四端于我者知皆擴而充之足以保四海卽是人弘道道與人非二易有大極人心之謂也張彝云天地至神必待人而存道書云天心人也人死天地萬物不可見此人弘道也人不得道

無異禽獸得道則參三才聯宇宙爲一體此亦道弘人也但道體無爲人心有覺故能不能之幾在人不在道聖人所以專責成于人也天下有負道之人無負人之道卽道不可離人自離道之意

子曰過而不改是謂過矣

過而能改不謂之過始以不覺而偶失旋覺而卽復則過終未成惟不改然後謂過過如過門過如過門偶未入過路偶未逢回步重入轉首相逢亦終未爲疎漏也

子曰吾嘗終日不食終夜不寢以思無益不如學也

聖人生知然亦無不學之理聖人不思然亦無廢思之理但聖人思與學較學者異聖人思是極深研幾窮神知化思卽學也聖人學是惇典庸禮由仁義行學卽思也所謂終日終夜以思者卽是發憤忘食不知老之將至而云無益者聖人無誑語蓋雖神明默識而耳目不交躬行不涉縱神游八極潛天潛地祇是虛見無憑卽二氏之空寂也舍庸言庸行別求頓悟如後世理學之性命雖極精微終是偏上非誠明一源費隱無間合內外之道又況揣摩妄想捕風捉影者乎聖人嘗自謂好學好學自不廢思非全不思

翻然別尋學也雖是謙已誨人而思與學實不與人同

此章卽下學而上達之理不學而思便是素隱理不離事

子曰君子謀道不謀食耕也餽在其中矣學也祿在其中矣君子憂道不憂貧

此爲未仕憂貧者言食以養生貧無以爲養故孳孳干祿在樂天知命之君子唯謀道耳食非所謀也何者食不可以謀得而道未有謀之不得者如農夫終歲勤動非不謀也而常有饑饉之年士日從事學問

未嘗求食也而亦未有饑餓之君子蓋得喪有命富貴在天士惟脩其在己以聽其在天苟能飽乎仁義又何願乎膏粱孟子云求之有道得之有命求在外者也卽餒在其中之意求則得之舍則失之求在我者也卽祿在其中之意

君子素位安命謀與憂皆人力也在事曰謀在心曰憂謀可爲道不可爲食憂可爲道不可爲貧道在己食與貧在天君子樂天知命求在我不求在外有終身之憂而無苟得之謀耕也二句卽上兩謀并較窮通得喪本乎自然謀食孰如農農耕則得食矣顧天

下亦有饑餒之農夫。未必謀者皆得。不謀食無如士。士無營。宜長貧矣。然自古亦多食祿之君子。未必不求者終窮。皆天也。卽不怨不尤之意。知此則知命。知命則樂天。君子豈舍道而憂貧乎。憂道者雖不得祿而得道。卽祿憂貧者祿未必得。而道先失。是以君子貴善謀也。

子曰。知及之。仁不能守之。雖得之。必失之。知及之。仁能守之。不莊以涖之。則民不敬。知及之。仁能守之。莊以涖之。勤之。不以禮未善也。

此論居上治民之道。因前章祿在中類記之。所謂憂

道者也。君子不患無位，患所以立。章內十一之字，皆指民言。知仁爲運治之本，莊敬爲脩身之要，禮爲化民之準，數者始于君心而達于天下者也。民僞難知，見理明而後諳練深，授政能達，是知及之也。民情至渙，居上寬而後容蓄衆，體元長人是仁能守之也。民志易玩，觀瞻肅而後體統尊，有威有儀是莊以涖之也。民風難移，教化行而後習俗美，興仁興讓是動之以禮也。四者缺一不可，苟知及矣，仁不能守，是管商之知也。愚民以術箝民以法，寬不足以容之，恩不足以結之，雖約而易散，雖成而易敗，可暫而難久，知及



矣。但能守矣。能哲而惠。則本立矣。苟君身不端。舉止不莊。則體統褻。而冠履之分不辨。所謂仁守者。過於寬而傷于縱。民有慢易之心。而不敬其上。可與興治乎。知及矣。仁守矣。莊蒞矣。本諸身者。內外交脩。而徵諸民者。又必有轉移變動之方。動如書云。四方風動。記云。明則動。動則變。而禮爲化民成俗之本。動民以禮。鼓之舞之。使遷善敏德。變其故而易其新。乃稱善治。不然。有賢君而無善俗。所謂莊蒞者。不過猛以糾其不率。刑以齊其無恥。去風動之化遠矣。教化不興。卽是君道未粹。故曰。未善也。註疏云。知以通其變。仁

以安其性莊以安其慢禮以安其情化民之善必備此四者近是朱註作理解惡空無著聖人言理不離事

子曰君子不可小知而可大受也小人不可大受而可小知也

不可小知謂不可以一長見耳非謂君子小事遂不足觀也大受不言知者君子器大而養深人所難測也小人亦有偏長可以見知若大受斷乎不能矣強而任之必有棟撓之患用材者宜辨也

不可小知非君子拙于小也所用止此耳委吏乘田

會計當牛羊豕出長壯之外無所用之譬量江海以杯水何足以知之

子曰民之於仁也甚於水火水火吾見蹈而死者矣未見蹈仁而死者也

民謂凡民民之言冥也卽民不可使知之民凡民視仁甚遠視爲仁甚難所謂舉莫能勝行莫能至需之甚急而憚之甚嚴比于水火殆有甚焉蓋水火民生所需蹈水火民情所畏水養人能溺人火養人能焚人蹈之則死其不蹈宜也若夫仁爲生理有蹈而生者未有蹈而死者其不蹈不亦惑乎蹈踐履也

曾子云仁以爲己任死而後已民所以畏仁也夫仁人心也至近而非遠百姓日用而不知放其心而不求於所切要者駭以爲難故曰民之于仁甚于水火怪之之辭若士君子則宜與凡民異矣舊解云仁與水火皆民所仰以生而仁最甚當兼畏意方與下文協既仰以生又畏其難也

水詳第六篇○火之言燬也物入卽毀也文象彖上之形白虎通云火之言委隨也隨物而麗也燧人鑽木作火周禮司燿掌行火政四時變國火以救時疾在天味爲鶉火心爲大火其正爲祝融閼伯其神爲

回祿亦云吳回其聲曰譴譴左傳宋將有火災或叫于大廟曰譴譴其氣爲鬱攸魯哀公三年司鐸災救火者濟濡帷幕鬱攸從之註云火氣也火乘風則倚韓非云魯人燒積澤天北風火南倚火有不焚者抱朴子云南海之中有蕭丘方千里自生火春起秋滅有木不焚取其華若皮績爲布浣則以火也是曰蕭丘之寒燄如水寒而有湯泉也餘詳陽貨篇

子曰當仁不讓於師

世間惟有性命不容推諉仁者人之性命以爲己任死而後已君子知天下不可先則後之知天下不可

上則下之凡事皆然惟有擔當仁便落後不得放下  
不得雖弟子于師每事不敢先不敢上至當仁時亦  
各自努力不曰父兄而曰師師責善者也父兄不才  
子弟能賢雖謂不讓于父兄亦可

子曰君子貞而不諒

貞正也安重之意正而能通果而不滯也易曰元亨利貞貞者元之始亨利之合也君子見定而養厚知  
幾待時生意盎然而不輕動曰貞諒者信也與亮通  
小明曰亮諒則窺闕比擬必信必果與貞似而實不  
同貞大而諒小貞通而諒固也不諒卽貞處見不諒

乃所以貞詳十四篇匹夫之諒

子曰事君敬其事而後其食

爲臣止敬受君之職自宜任君之事盡心盡力分所當然至于酬德報功頒賜行賞祿有厚薄惟君主之靜聽處分非臣所得預也豈敢一心供事一心懷利乎如此則臣節立而事亦克終矣

子曰有教無類

夫人所以限于匪彝爲士類不齒者以其無君子之教也君子有教期于兼善舉世盡歸甄陶何問善不善乎無類者不擇人也若擇人又焉用君子之教爲

如孔子于互鄉孟子于墨者夷之是也有無二字相應聖人如天然萬物美惡大小無不欲其生之至于凶祥好醜物自爲類耳天不爲類也

子曰道不同不相爲謀

正人君子不期自親聖主賢臣不約自合舜生東夷文王生西夷千里千年若合符節故曰二人同心其利斷金同心之言其臭如蘭若夫道不同或小人遇君子或正士逢憮人薰蕕異器牛驥異皁欲效忠告則肝膽各殊欲問區畫則意見不合雖覲面晤語豈相爲謀此因上文有教無類戒恒人下士慎所與也



若聖人何人不可與哉

子曰辭達而已矣

辭凡命告作述皆是也。有意而不能達則拙于辭無意而強作則辭爲虛。必先有可達之意存于中。情深機沛而後發于持滿以不盡之辭。敷有餘之意行乎當行止乎當止。辭出而神傳。所謂脩辭立誠居乎其業者也。六經之文炳如日星。唯以達聖人精蘊俟諸百世耳。如易之初惟有卦爻。文王作彖辭。周公作爻辭。孔子作十翼。窮神知化方是達論語二十篇并聖人神情丰采可識亦是達達通也。作者以此通其意。

於天下後世將使學者由此以適道入德也

師冕見及階子曰階也及席子曰席也皆坐子告之曰某在斯某在斯師冕出子張問曰與師言之道與子曰然固相~~與~~師之道也

師樂官之長名冕瞽者也席坐席古者燕坐四人共一席若五人則長者異席某指在坐之人也凡名未定則稱某斯指席上坐次既告之席又告之某人在此某人在此使知所讓也瞽必有相恒人皆能告但衆人行之而不著聖人真性洋溢顯微無間不侮鰥寡由仁義行非行仁義也子張堂堂之見謂聖道高

遠問此等亦是道否。諺所謂騎驢覓驢者耳。夫子答云然者。然其爲道也。道體事不遺。相瞽師之事便是相瞽師之道。此語躍然無行不與。謝顯道嘗舉此與予見齊東二章證一部論語云。洒掃應對進退上達天德得解矣。

古樂官用瞽。寡視則聽專也。瞽必有相扶持之。周禮春官大師有眡瞭。相瞽者也。周任云危而不持。顛而不扶。焉用彼相。卽此也。禮器云禮有擯詔樂有相步溫之至也。然據周禮上瞽四十人。中瞽百人。下瞽百有六十人。夫安得同時有無目賢而知音者三百人。

之多手苟賢而知音不必瞽皆可稱瞽工也上世有神瞽識音樂後襲其名故夏學稱瞽宗祀先瞽也如後世善射者稱羿非必盡古之羿也此師冕則真瞽若師摯干繚缺方叔武襄輩適齊楚入河海豈皆無目者而能遠涉乎甚矣訓詁家之泥也

論語詳解卷十五終